



# KRUŠKE

## (Ili uticaj istih na narodno zdravlje....)

**N**e znam za vas, dragi moji, ali ja sve češće, onako mahinalno, krenem skinuti sunčane naočale dok gledam ovu nam Bosnu i Hercegovinu. Problem je u tome što, na moju veliku žalost, a sve češće i užas, ustanovim da sunčanih naočala jednostavno nema. Što će reći, sve je crno onako "zaprave". Privreda se lagano, ali stabilno zahuktava nizbrdo, javna potrošnja žilavo ostaje na istom nivou, a politike, čak ni sulude, nema ni na vidiku. Na sceni je politikanstvo najgore vrste, gdje se zbog kile mesa kolju čitava stada, gdje se obećavaju i kule i gradovi, a Boga mi, i države kao od šale, samo s jednim jedinim ciljem - preživjeti još jedan dan - na Vlasti naravno. To što strane investicije padaju kao kamen, to što nas niko pri zdravoj pameti ne uzima za ozbiljno, što niko na vlasti nema ljubavi prema (bar svome, rekla bih, ako ne prema svim) narodu, nikoga čini mi se ne sekira previše. A ljubav prema narodu je potrebna da bi se istom mogla svezati dobra šamarčina i ostati živ (iliti na Vlasti, pošto je za homopoliticiusa to jedno te isto). Jer, ma šta vam govorili, istina je da na sceni imamo D R U Š T V E N U krizu - a ne političku. Narod(i) su bolesni. Političari su samo simptomi te bolesti. A svako i bez medicinskog fakulteta zna gdje završi onaj kome liječe posljedice umjesto uzroka...

S druge strane, prilično je tiho, bar na površini, prošla jedna vijest koja je, znam iz vrlo pouzdanih izvora, uzdrmla mnoge u BiH, baš u trenutku kad nema antitetanus vakcina, citostatika i tako dalje i tako gore. Vijest je da je Siemens AG (opet) pod istragom zbog davanja mita u milionskim iznosima našim, domaćim hairlijama, a sve u cilju dobijanja poslova. Pošto ovi naši znaju da to nije istraga bosanskog tipa koju vode ili nesposobni ili "teledirigovani" tužioc, već kako mi reče jedan "potencijalni" hairlija - to ti je Gestapo - paniku skoro možete rezati nožem. Oni (Siemens, da budem jasna) naučili su ove naše da prvo uzimaju, pa da traže, a zatim i da otimaju procenat od svake nabavke. Ali su napravili elementarnu grešku - dozvolili su da ih uhvate.

A Nijemci ko Nijemci - bolesna pedanterija. Sve fino pribilježili, iznose, račune, kurire...I nimalo ne sumnjam da će se Patrija sindrom desiti i ovdje. Jer, kada Švabe zatresu Siemens, puno će bosanskih krušaka pasti. I to mogu samo Nijemci - da u Njemačkoj beru bosanske kruške. A kako rekoh na početku - nisu to bilo kakve - to su uticajne kruške.

Ali da su zrele - zrele su...

P.S. Umalo zaboravih - dobar tek vam želim... **B**

Aida Delić,  
glavna i odgovorna urednica